



Br: *7/1-904/25-5202*

5. decembar 2025.

IZVJEŠTAJ

o učešću potpredsjednika Vlade za međunarodne odnose i ministra vanjskih poslova Crne Gore mr Ervina Ibrahimovića na Sastanku ministara vanjskih poslova Strategije EU za Dunavski region, Sarajevo, 5. novembra 2025. godine

Potpredsjednik Vlade Crne Gore i ministar vanjskih poslova mr Ervin Ibrahimović učestvovao je, na poziv ministra vanjskih poslova Bosne i Hercegovine Elmedina Konakovića, na Sastanku ministara vanjskih poslova Strategije EU za Dunavski region, koji je održan u Sarajevu, 5. novembra 2025. godine.

U delegaciji su bili i: otpravnica poslova a.i. u Ambasadi Crne Gore u Sarajevu **Satka Hajdarpašić**, generalna direktorica za multilateralne poslove **Nizaheta Kurpejović Cikotić**, drugi sekretar u Generalnom direktoratu za EU **Marko Srdanović** i ataše u Generalnom direktoratu za multilateralne poslove **Isidora Drašković**.

Sastanak u Sarajevu okupio je predstavnike četrnaest država članica, Evropske komisije i regionalnih inicijativa, civilnog društva i akademske zajednice. Forum, u organizaciji Direkcije za evropske integracije i Ministarstva vanjskih poslova Bosne i Hercegovine, u saradnji sa Evropskom komisijom, projektom DSP (Dunavska strateška tačka) i „Interreg Danube Region Programme“, je centralni događaj jednogodišnjeg predsjedavanja Bosne i Hercegovine Strategijom EU za Dunavski region.

Glavne teme Sastanka bile su: proširenje EU i podrška zemljama kandidatima; sprječavanje odliva visokoobrazovnog kadra; obrazovanje, demografske promjene; zelene i digitalne tranzicije u Dunavskom regionu; saradnja u okviru transnacionalnog Dunavskog programa (DRP) za otporniju, održiviju i povezaniju Dunavski region.

Na Sastanku ministara vanjskih poslova Dunavskog regiona je usvojena Sarajevska deklaracija - zajednička izjava ministara vanjskih poslova Dunavskog regiona. Na ministarskom nivou su, osim naše delegacije, bile predstavljene Bosna i Hercegovina, Hrvatska, dok su ostale (Austrija, Bugarska, Češka, Mađarska, Moldavija, Rumunija, Srbija, Slovačka, Slovenija, EU, Njemačka i Ukrajina) bile predstavljene uglavnom na nivou državnog sekretara i ambasadora.

Potpredsjednik Vlade i ministar vanjskih poslova Crne Gore **mr Ervin Ibrahimović** čestitao je Bosni i Hercegovini na organizaciji sastanka i naglasio značaj Dunavske strategije kroz jačanje evropske perspektive i regionalne saradnje. Istakao da Crna Gora doprinosi evropskoj saradnji kroz povezivanje u oblastima održivosti, energetike, mobilnosti i klimatske otpornosti. Potvrdio podršku Ukrajini i osudu ruske agresije, te istakao spremnost Crne Gore za aktivno učešće u narednim inicijativama, uključujući predsjedavanje Samitom EU-Zapadni Balkan 2026. godine, radi promovisanja sinergije i inkluzivnosti regionalnih inicijativa.

Učesnici su istakli da je proširenje EU više od tehničkog procesa, odnosno da predstavlja strateški prioritet i geopolitički instrument koji doprinosi stabilnosti, bezbjednosti i prosperitetu

cijele Evrope. Proces proširenja opisali kao ulaganje u mir i dugoročnu održivost kontinenta, uz naglasak da mora ostati zasnovan na jasnim kriterijumima, dosljednoj primjeni evropskih standarda i principu zasluga.

U okviru diskusije posebno je naglašeno da Dunavska strategija, kroz svoje četiri glavne oblasti djelovanja – povezivanje, zaštitu životne sredine, jačanje prosperiteta i institucionalni razvoj – predstavlja snažan okvir za saradnju država članica i kandidata. Strategija doprinosi konkretnom napretku u usklađivanju nacionalnih zakonodavstava sa evropskim pravnim okvirom, jačanju institucionalnih kapaciteta i izgradnji povjerenja među susjednim zemljama.

Učesnici su jednoglasno potvrdili da je proces proširenja EU neraskidivo povezan sa regionalnom saradnjom, a Dunavska strategija prepoznata je kao ključni okvir za njegovo sprovođenje. Zaključeno je da buduće djelovanje treba da bude usmjereno na dublje povezivanje politika, jačanje zajedničkih projekata i konkretne rezultate koji će donijeti opipljive koristi građanima regiona.

Nakon ministarskog sastanka, Bosna i Hercegovina je zvanično predala predsjedavanje EU Dunavske strategije Bugarskoj.

Na marginama događaja, potpredsjednik Vlade i ministar vanjskih poslova **mr Ervin Ibrahimović** imao je bilateralni susret sa generalnim sekretarom Savjeta za regionalnu saradnju (RCC) Amerom Kapetanovićem. Izrazio je očekivanje povodom uključivanja RCC u proces definisanja prioriteta predsjedavanja i njegovog planiranja od samog početka radi efikasnije operativnosti, te izvijestio da je na Samitu Berlinskog procesa u Londonu usvojeno 15 rezultata (deliverables) kao direktno postignuće rada Sekretarijata RCC.

Ibrahimović je informisao da će 2026. godine Crna Gora obilježiti dvadesetu godišnjicu od obnove nezavisnosti, ali i predsjedavati Berlinskom procesu, Fondu za Zapadni Balkan (od januara do decembra 2026) i Komitetu ministara Savjeta Evrope (od novembra 2026. do maja 2027), kao i da će biti domaćin Samita EU – Zapadni Balkan 1. juna 2026. U kontekstu Berlinskog procesa, **Ibrahimović** iskazao spremnost da blisko sarađujemo sa državama regiona u cilju efikasne implementacije dogovorenih obaveza, posebno Zajedničkog regionalnog tržišta, Zelene i Digitalne agende, te razvoja novih programa u cilju dalje povezanosti i napretka regiona. Kao neke od napora Crne Gore u unapređenju ključnih politika, **Ibrahimović** je naveo osnivanje Mreže diplomatkinja u okviru MVP, najavu ukidanja rominga u okviru EU, potpisivanje ugovora o priznavanju vozačkih dozvola na području Njemačke, kao i priključivanje Crne Gore Jedinstvenom području plaćanja u eurima (SEPA) i učešće u evropskom platnom sistemu sa državama članicama Evropske unije, još jednom ističući značajnu ulogu RCC. Posebno pozitivno ocijenio što je Berlinski proces prepoznao Fond za Zapadni Balkan kao mehanizam koji ima kapacitet da doprinese regionalnoj saradnji i u oblasti rodne ravnopravnosti i što će 15% budžeta Fonda biti usmjereno na podršku inicijativama upravo na tu temu.

Ibrahimović je takođe pozdravio početak rada Mreže JIE za osiguranje od rizika od katastrofa i dijeljenja rizika. Posebno važnim aspektom djelovanja **Ibrahimović** je naveo sajber bezbjednosti, te apelovao da RCC dodatno ohrabri države ZB6 da pristupe Centru za sajber kapacitete (WB3C), čime bi se Centar pozicionirao kao regionalno čvorište za izgradnju kapaciteta u ovoj oblasti.

OCJENA POSJETE:

Posjeta je ocijenjena kao uspješna. Učešće potpredsjednika Vlade i ministra vanjskih poslova Crne Gore Ervina Ibrahimovića na Sastanku ministara vanjskih poslova Strategije EU za Dunavski region u Sarajevu bila je prilika za promociju evropske perspektive Crne Gore i jačanje regionalne saradnje, kao i za isticanje privrženosti zajedničkim ciljevima bezbjednosti i stabilnosti. Sastanak sa generalnim sekretarom Kapetanovićem je potvrdio snažnu posvećenost Crne Gore i RCC regionu. Izražena je jasna volja i spremnost da Crna Gora uz pomoć Savjeta u okviru Berlinskog procesa nastavi da jača regionalnu saradnju i ubrza evropsku integraciju Zapadnog Balkana.

PREDLOG ZAKLJUČKA

Vlada Crne Gore je, na sjednici od _____ 2025. godine, razmotrila i usvojila Izvještaj o učešću potpredsjednika Vlade i ministra vanjskih poslova mr Ervina Ibrahimovića na Sastanku ministara vanjskih poslova Strategije EU za Dunavski region, Sarajevo, 5. novembar 2025. godine.